

18 gbr 1633 ~~Luxe~~

# DECLARATION [Luxe]

DV ROY, PORTANT  
defenses de porter aucunes découpu-  
res, broderies de fil, soye, capiton, or ou  
argent, passemens, dentelles, point-  
coupez, entretoiles & autres enrichis- [56K]  
semens manufacturez tant dedans que  
dehors le Royaume: Et à tous Mar-  
chands Lingers de trafiquer desdits ou-  
rages, ny les exposer en vente.

*Verifiée en Parlement le douzième Decembre  
mil six cens trente-trois.*



A PARIS,  
Par ANTOINE ESTIENE, P. MET-  
TAYER & C. PREVOST, Impri-  
meurs ordinaires du Roy.

---

M. DC. XXXIII.  
*Avec Prinilege de sa Majesté.*

Case

F

39

.326

1633 fs

THE NEWBERRY  
LIBRARY



**L**OVIS par la grace de Dieu  
Roy de France & de Nauar-  
re, A tous ceux qui ces pre-  
sentes Lettres verront, Sa-  
lut. LES Ordonnances des  
Rois nos predecesseurs & les nostres; pu-  
bliées contre le luxe & les superfluitez,  
comme elles ont ressentý, ainsi que toutes  
les autres parties de la police, les effects  
des guerres ciuiles qui ont à diuerses re-  
prises trauaillé nostre Royaume, aussi  
sont-elles demeurées sans aucune execu-  
tion: La licence née dans la confusion de  
la guerre, a esté suiuié du luxe, qui a pris  
vn tel accroissement par la conniuece  
des Magistrats, qu'il est pour reduire ce  
Royaume à vne langueur mortelle; car  
c'est vn moyen tres-certain & ordinaire  
pour transporter l'or & l'argent hors de  
nostre Royaume, les Estrangers fournis-  
sant volontiers à nos Sujets avec grand  
auantage la cause de leur ruine, par le de-

bit qu'ils leur font des choses du tout inutiles à la vie, dont tres-sagement ils n'vissent pas eux-mesmes. D'où vient qu'aucuns de nos Sujets, pour oster ce profit aux Estrangers, & remedier, ce leur semble, à ce desordre, ont voulu, tant ils sont ingenieux à la ruine du public, imiter & contrefaire ces marchandises, leur imposant neantmoins vn prix aussi excessif, comme si elles estoient apportées de dehors; ce qui augmente le mal, le rendant plus facile & plus commode. D'ailleurs, vne grande partie de nos Sujets par exemple ou par vn vain desir de paroistre, s'engagent tellement à la despense de ces marchandises superflues, que la ruine des meilleures familles semble inuitable, & s'ostent le moyen de nous seruir s'il suruenoit quelque occasion de les employer. NE pouuans donc plus supporter sans vne manifeste diminution de nostre autorité, vn si grand mespris de nos Ordonnances; Et voulans preuenir la ruine qui menace nos Sujets de toutes sortes de qualitez, par les grandes despenses où la vanité les oblige, nous estimons de uoir opposer de nouveaux remedes à ce



mal, qui s'est insensiblement accumulé  
dans le corps de l'Estat, & de faire les  
loix, non à la verité proportionnées à cer-  
te effrenée licence, à laquelle avec l'aide  
de Dieu, nous esperons peu à peu de met-  
tre ordre, mais tel qu'une partie du mal  
qui presse le plus, sera reprimée, A v o n s,  
de l'Avis de nostre Conseil, auquel cette  
matiere a esté mise en deliberation, & de  
nostre certaine science, pleine puissance  
& autorité royale, fait & faisons tres-  
expreses inhibitions & defenses à tous  
nos Sujets, de quelque qualité & condi-  
tion qu'ils soient, d'appliquer & porter  
dorenavant, à commencer huitaine a-  
pres la publication du present Edict, en  
leurs chemises, collets, manchettes, coëf-  
fes & autres linges, aucunes découpu-  
res, broderies de fil d'or ou d'argent, pas-  
semens, dentelles, point-coupez, mani-  
facturez tant dedans que dehors nostre  
Royaume, fors les passemens qui seront  
faits en nostredit Royaume, iusques au  
prix & valeur de neuf liures chacune au-  
ne, desquels nous leur permettons l'vsa-  
ge, & ce sur peine à l'encontre des con-  
trevenans, de confiscation desdits linges

& ouurages, & en outre de quinze cens liures d'amende, applicables le tiers aux denonciateurs, les deux autres tiers au principal Hospital de la Ville où les Jugemens & Sentences seront renduës. Et d'autant que les Marchands Lingers ont esté ceux qui ont donné occasion au luxe & despenses excessiues qui se sont faites par nos Sujets en l'vsage desdits ouurages, par le moyen du trafic qu'ils en ont fait avec les Estrangers, y estans attirez par le grand gain qu'ils faisoient en ce commerce; Afin d'en retrencher entiere-ment la cause, A v o n s pareillement fait tres-expresses inhibitions & defenses à tous Marchands Lingers & autres de nos Sujets de quelque qualité & condition qu'ils soient, de trafiquer desdits ouurages & marchandises cy-dessus defenduës, tant dedans que dehors nostre Royaume, ny les exposer en vente à nosdits Sujets apres le temps cy-dessus porté, & ce à peine contre chacun des contreuenans, de confiscation de tous lesdits ouurages & marchandises, & de trois mil liures d'amende, le tiers applicable aux denonciateurs, & les deux autres tiers à l'Hospital

principal des lieux où ils seront demeurans & domiciliez, & en outre d'estre declarez incapables de pouuoir exercer aucun trafic ny commerce, sans que pour quelque cause & occasion que ce soit, ils puissent à l'aduenir estre reestablis à exercer ledit commerce. Et afin que lesdits Marchands ne prennent occasion de continuer ledit trafic, supposant que ce sont marchandises qu'ils auoient avant nostre present Edict, **V O V L O N S** & ordonnons que quinzaine apres la publication d'ice-luy, ils se transportent és Greffes des Iustices ordinaires des lieux où ils seront demeurans & domiciliez, pour là affermer & declarer la quantité qu'ils ont par deuers eux desdites marchandises, dont ils laisseront vn inuentaie signé d'eux, sur lequel lesdits Iuges ou autres par eux commis, pourront faire la visite desdits ouurages en presence des Maistres & Gardes de la marchandise, sans que pour ce lesdits Iuges ny autres, puissent pour raison de ladite visite, prendre ny exiger aucun salaire. **V O V L O N S** & entendons que les Sentences & Iugemens de confiscation & amendes qui seront rendus à

l'encontre des contreuenans, soient executez, nonobstant oppositions & appellations quelconques.

SI DONNONS EN MANDEMENT à nos amez & feaux Conseillers les Gens tenans nos Cours de Parlemens, Baillifs, Seneschaux, Iuges ou leurs Lieutenans, & à tous nos autres Iusticiers & Officiers qu'il appartiendra, que ces presentes ils facent lire, publier, registrer, executer, garder & obseruer inuiolablement selon leur forme & teneur: Enjoignons à nos Procureurs Generaux, leurs Substituts presens & à venir, y tenir la main, & faire toutes les diligences requises & necessaires pour ladite execution, sur peine de nous respondre des contrauentions en leurs propres & priuez noms: CAR tel est nostre plaisir. EN tesmoin dequoy nous auons fait mettre nostre Seel à cedités presentes. DONNE' à Saint Germain en Laye le dix-huictième iour de Nouembre, l'an de grace mil six cens trente-trois, & de nostre regne le vingt-quatrième. Signé, LOUIS, & sur le reply, Par le Roy, DE LOMENIE, & seellée sur double queuë du grand Seau



9

Seau de cire iaune. Et encor à costé est  
écrit:

Leües, publiées & registrées, ouï & ce re-  
querant le Procureur General du Roy, pour  
estre executées, gardées & obseruées selon  
leur forme & teneur, aux charges & condi-  
tions portées par l'Arrest & registre du septiè-  
me de ce mois, Et copies collationnées aux ori-  
ginaux d'icelles, enuoyées aux Bailliages &  
Seneschausées de ce ressort, pour y estre pareil-  
lement leües, publiées, registrées, gardées &  
obseruées, à la diligence des Substituts dudit  
Procureur General, auxquels enioint d'y tenir  
la main, & certifier la Cour auoir ce fait au  
mois. A Paris en Parlement le douzième  
Decembre mil six cens trente-trois. |

Signé, DV TILLET.

---

## EXTRAICT DES REGISTRES de Parlement.

**V**E V par la Cour, les Grand' Cham-  
bre, Tournelle & de l'Edict assem-  
blées, les Lettres Patentes en forme d'E-

B


dict, données à Saint Germain en Laye le dix-huictième iour de Nouembre mil six cens trente-trois, Signées, L O V I S, & sur le reply, Par le Roy, D E L O M E N I E, & scellées en double queue du grand Seau de cire iaune; Par lesquelles & pour les causes y contenuës, ledit Seigneur fait tres-expresses inhibitions & defenses à tous ses Sujets, de quelque qualité & condition qu'ils soient, de porter doresnauant, à commencer huitaine apres la publication desdites Lettres, en leurs chemises, collets, manchettes, coiffes & autres linges, aucunes découpures, broderies de fil d'or ou d'argent, passe-mens, dentelles, poinct-coupez, manufacturez tant dedans que dehors le Royaume, fors les passemens qui seront faits en sondit Royaume, iusques à la valeur de neuf liures chacune aulac, Et à tous Marchands Lingers de trafiquer desdits ouvrages, ny les exposer en vente, sous les peines y contenuës, suiuant & ainsi qu'il est plus amplement porté par lesdites Lettres. Conclusions du Procureur General du Roy. La matiere mise en deliberation: L A D I T E C O V R a ordonné


& ordonne, que lesdites Lettres seront  
 leües, publiées, registrées, & copies d'i-  
 celles enuoyées aux Bailliages & Senes-  
 chaussées de ce ressort, pour y estre pareil-  
 lement leües, publiées, registrées, gar-  
 dées & obseruées selon leur forme & te-  
 neur. Et à ce que fraude ne soit faite à  
 l'exécution d'icelles: LADITE COVR  
 en consequence desdites Lettres, A fait  
 & fait inhibitions & defenses à toutes per-  
 sonnes, de porter en leurs chemises, ca-  
 misoles, coiffes, collets, soit à fraizes ou  
 rabats, manchettes, mouchoirs tant de  
 col qu'autres, bas à botter & autres lin-  
 ges, aucunes découpures, broderies de  
 fil, soye, capiton, or ou argent, ny mettre  
 sur iceux aucune dentelle, passemens,  
 poinct-coupez & autres enrichissemens,  
 manufacturez tant dedans que dehors le  
 Royaume, fors les passemens qui seront  
 faits dans le Royaume, iusques à la va-  
 leur de neuf liures l'aulne seulement; &  
 sans que l'on puisse coudre ny appliquer  
 deux ou plusieurs passemens ou entre-  
 toiles ensemble, ny que l'on puisse porter  
 sur le col ou ailleurs plus d'une piece qui  
 soit garnie dudit passement, soit fraizes,


rabats, manchettes, mouchoirs, tour de col ou autre, ny qui ait plus d'ouvrage que le tour d'icelle, le tout sur les peines portées par lesdites Lettres. Enjoint aux Officiers de tenir la main à l'exécution desdites Lettres, Et ce qui sera par eux ordonné, executé, nonobstant oppositions ou appellations quelconques, & sans prejudice d'icelles. FAICT en Parlement le septième Decembre mil six cents trente-trois.


Signé, DV TILLET.













Principal mo

— — — — 32000<sup>4</sup>  
two hundred and fifty  
hundred . . . . 64000  

---

96000

